

վարչական տույժ նշանակելու մասին

«10» օգոստոսի 2020թ.

ք. Երևան

ՀՀ պետական եկամուտների կոմիտեի իրավաբանական վարչության պետ Ա.Մնացականյանս, քննելով «ՔՈՐԹՀԻԼ ԿՈՐՊՈՐԱՑԻԱՅԻ ՀԱՅԱՍՏԱՆԻ ՄԱՍՆԱՃՅՈՒՂ» ՕԻԱՄ մաքսային ձևակերպումներ իրականացրած Ռոբերտ Ավոյանի վերաբերյալ նյութերը.

Պ Ա Ր Զ Ե Ց Ի

«ՔՈՐԹՀԻԼ ԿՈՐՊՈՐԱՑԻԱՅԻ ՀԱՅԱՍՏԱՆԻ ՄԱՍՆԱՃՅՈՒՂ» Օտարերկրյա իրավաբանական անձի մասնաճյուղի 05.11.2018թ. թիվ 05100010/051118/0070419 ապրանքների հայտարարագրով «Բացթողում ներքին սպառման համար» մաքսային ընթացակարգով Գերմանիայից Հայաստանի Հանրապետության տարածք է ներմուծվել 41,901,635 ՀՀ դրամ մաքսային արժեքով սարքավորումներ՝ հասարակական աշխատանքների, շինարարության և նույնանման այլ աշխատանքների համար՝ «Թրթռավոր գլդոն HAMM Tandem Roller HD+90iVV (օգտագործված)» ապրանքը, հայտարարագրվել է ԵԱՏՄ ԱՏԳ ԱԱ 8479 10 000 00 ծածկագրով (մաքսատուրքի դրույքաչափը՝ 0%):

ՀՀ ՊԵԿ մաքսային հսկողության վարչության պետի 01.07.2020թ. «Ապրանքի ոչ ճիշտ դասակարգում հայտնաբերվելու դեպքում ապրանքի դասակարգման վերաբերյալ» թիվ ԱԴՈ-20-000059 որոշմամբ հաստատվել է, որ վերը նշված հայտարարագրով հայտարարագրված սարքավորումներ՝ հասարակական աշխատանքների, շինարարության և նույնանման այլ աշխատանքների համար, «Թրթռավոր գլդոն HAMM Tandem Roller HD+90iVV (օգտագործված)» ապրանքը ԵԱՏՄ ԱՏԳ ԱԱ 8479 10 000 0 ծածկագրի (մաքսատուրքի դրույքաչափը՝ 0%) փոխարեն ենթակա է հայտարարագրման՝ ԵԱՏՄ ԱՏԳ ԱԱ 8429 40 100 0 ծածկագրով (մաքսատուրքի դրույքաչափը՝ 5%):

Ուսումնասիրության ընթացքում պարզ է դարձել, որ ապրանքն իրենից ներկայացնում է թրթռուավոր ճանապարհային գլդոն, որը հստակ նկարագրված է ԵԱՏՄ ԱՏԳ ԱԱ 8429 ապրանքային դիրքում:

Փաստի առթիվ «ՔՈՐԹՀԻԼ ԿՈՐՊՈՐԱՑԻԱՅԻ ՀԱՅԱՍՏԱՆԻ ՄԱՍՆԱՃՅՈՒՂ» ՕԻԱՄ թիվ 05100010/180118/0001642 ապրանքային հայտարարագրով ներմուծված ապրանքների մաքսային ձևակերպումներ իրականացրած Ռոբերտ Ավոյանի նկատմամբ ՀՀ մաքսային օրենսգրքի 203-րդ հոդվածի 1-ին կետի 2-րդ պարբերության հատկանիշներով 10.07.2020թ. կազմվել է մաքսային կանոնների խախտման արձանագրություն:

Վարչական վարույթի շրջանակներում Ռոբերտ Ավոյանը հայտնել է, որ իր կողմից թիվ 05100010/051118/0070419 Ա/Հ-ով ձևակերպված թրթռավոր գլդոնը ԵԱՏՄ ԱՏԳ ԱԱ 84791000000 ծածկագրով հայտարարագրվել է ապրանքի բոլոր ուղեկցող փաստաթղթերում՝ հաշիվ-ապրանքագրում, փաթեթավորման թերթիկում, Գերմանիայի կողմից տրված արտահանման հայտարարագրում և (CMR) տրանսպորտային բեռնագրում նշված վերոնշյալ ծածկագրով, ապրանքը իրենից ներկայացնում է ոչ միայն ճանապարհային այլ նաև արտաճանապարհային շինարարական սարքավորում, որը նախատեսված է արտաճանապարհային գրունտը հարթեցնելու, ճանապարհաեզրերի ասֆալտը կտրելու ինչպես նաև ճանապարհային ասֆալտը հարթեցնելու համար, ապրանքի մանրամասն նկարագրությունը և տեխնիկական առանձնահատկությունները անձամբ ճշտել է Գերմանիայում գտնվող և

վաճառող հանդիսացող ընկերությունից և որպես ապացույց կից ներկայացրել է իրենց կողմից ուղարկված գրության կնքված բնօրինակը գերմաներեն լեզվով և դրա թարգմանությունը, ավելացրել է նաև, որ Ա/Հ-ի համար ընտրվել է հսկողության <<կարմիր ուղի>> ընթացակարգը, որի արդյունքում իրականացվել է ստուգում մաքսային մարմնի կողմից: Մաքսային տեսուչը, ուսումնասիրելով բեռն ուղեկցող փաստաթղթերը, թույլ է տվել իրականացնել հետագա ընթացքը, այն է՝ բեռի բացթողումը մաքսային հսկողության տարածքից: Պահեստի տեսուչը, իրականացնելով լրացուցիչ ստուգում և զննում, սահմանված կարգով կատարել է բեռի բացթողումը:

Ռոբերտ Ավոյանը ներկայացրել է գերմանական ընկերության նամակը, որտեղ նշված է, որ <<ըստ արտաքին առևտրի ապրանքների ցանկի և եվրոպական մաքսային պորտալի, մաքսային սակագնի համարը 84791000-ը կարող է օգտագործվել ճանապարհների կառուցման համար մեքենաներ: Tandem rollers-ը ճանապարհի շինարարության մեջ օգտագործվում է ասֆալտի սեղմման կտրման և հարթեցման համար: Տեղական մաքսային մարմինների հետ խորհրդակցելով՝ բոլոր փաստաթղթավորման համար օգտագործվում է 84791000 մաքսային սակագինը>>:

Ռոբերտ Ավոյանի ներկայացրած բացատրությունը և կից փաստաթղթերը չեն կարող հանդիսանալ վարչական պատասխանատվությունը բացառող հանգամանք:

ԵԱՏՄ մաքսային օրենսգրքի (այսուհետ՝ Օրենսգիրք) 2-րդ հոդվածի 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ, իսկ 35-րդ կետի համաձայն մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ և (կամ) ապրանքների բացթողման համար անհրաժեշտ այլ տեղեկությունների հայտագրումն է:

Օրենսգրքի 84-րդ հոդվածի 2-րդ կետով սահմանված են հայտարարատուի պարտականությունները, այն է՝ կատարել ապրանքների մաքսային հայտարարագրում, մաքսային մարմին ներկայացնել մաքսային հայտարարագրում հայտագրված տեղեկությունները հաստատող փաստաթղթեր, ներկայացնել հայտարարագրվող ապրանքները և վճարել մաքսային վճարները, իսկ 3-րդ կետի համաձայն հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու, ինչպես նաեւ մաքսային ներկայացուցչին անվավեր, այդ թվում՝ կեղծ և (կամ) ակնհայտ ոչ հավաստի (սուտ) տեղեկություններ պարունակող փաստաթղթեր ներկայացնելու համար:

Օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: Մաքսային հայտարարագրումն իրականացվում է գրավոր և (կամ) էլեկտրոնային եղանակով: ԵԱՏՄ մաքսային օրենսգրքի 106-րդ հոդվածով սահմանվում են ապրանքների հայտարարագրերում նշման ենթակա տեղեկությունները: Սույն հոդվածի 1-ին մասի 4-րդ կետի համաձայն՝ հայտարարագրում նշվում են տեղեկություններ նաև ապրանքների մասին, որոնց մեջ ի թիվս այլոց նշվում է անվանումը, նկարագրությանը, որն անհրաժեշտ է այն մաքսային վճարների, հատուկ, հակազնազցման, փոխհատուցման տուրքերի և այլ վճարների հաշվարկման

և գանձման համար, ապրանքների ծածկագիրը՝ Արտաքին տնտեսական գործունեության ապրանքային անվանացանկին համապատասխան:

Օրենսգրքի 404-րդ հոդվածի 1-ին մասի համաձայն՝ մաքսային գործառնություններ իրականացնելիս մաքսային ներկայացուցիչն ունի նույն իրավունքները, որոնք ունի այն անձը, որը լիազորում է նրան ներկայացնելու իր շահերը մաքսային մարմինների հետ փոխհարաբերություններում: Իր գործունեությունն իրականացնելիս մաքսային ներկայացուցիչն իրավունք ունի իր կողմից ներկայացվող անձից պահանջելու մաքսային գործառնությունների իրականացման համար անհրաժեշտ, այդ թվում՝ առևտրային, բանկային և այլ գաղտնիք կազմող տեղեկատվություն կամ այլ գաղտնի տեղեկատվություն պարունակող փաստաթղթեր և տեղեկություններ: 405-րդ հոդվածի 1-ին մասի 6-րդ կետի համաձայն՝ մաքսային ներկայացուցիչը պարտավոր է կատարել սույն Օրենսգրքով սահմանված և (կամ) անդամ պետությունների՝ մաքսային կարգավորման վերաբերյալ օրենսդրությամբ սահմանվող այլ պարտականություններ: Օրենսգրքի 20-րդ հոդվածի 1-ին և 4-րդ մասերի համաձայն՝ հայտարարատուն և այլ անձինք ապրանքների դասակարգումն իրականացնում են ԱՏԳ ԱԱ-ին համապատասխան՝ մաքսային հայտարարագրման ժամանակ և այն դեպքերում, երբ մաքսային կարգավորման ոլորտի միջազգային պայմանագրերի ու ակտերի համաձայն, մաքսային մարմին են հայտնում ապրանքի ծածկագիրը՝ Արտաքին տնտեսական գործունեության ապրանքային անվանացանկին համապատասխան: Մաքսային հայտարարագրման ժամանակ ապրանքների դասակարգում չի իրականացվում այն դեպքում, երբ, սույն Օրենսգրքին համապատասխան, ապրանքի ծածկագրի վերաբերյալ տվյալները ենթակա չեն մատնանշման մաքսային հայտարարագրում՝ Արտաքին տնտեսական գործունեության ապրանքային անվանացանկին համապատասխան: Առևտրային, տրանսպորտային (փոխադրման) և (կամ) այլ փաստաթղթերում, ինչպես նաև եզրակացություններում, տեղեկանքներում, փորձագիտական հիմնարկների կողմից տրվող փորձաքննության արձանագրություններում նշված ապրանքների ծածկագրերը պարտադիր չեն ապրանքների դասակարգման համար:

Ելնելով վերոնշյալից՝ Ռոբերտ Ավոյանը պարտավոր էր իրականացնել մատակարար ընկերության կողմից ձեռք բերված «հասարակական աշխատանքների, շինարարության և նույնանման այլ աշխատանքների համար, «Թրթռավոր գլոն HAMM Tandem Roller HD+90iVV (օգտագործված)» ապրանքի նկարագրության ուսումնասիրում և փաստացի ԵԱՏՄ ԱՏԳ ԱԱ 8429 40 100 0 ծածկագրով հայտարարագրում:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում

առաջանում է մաքսային վճարների պակաս հաշվարկում կամ չհաշվարկում, առաջացնում է տուգանք՝ այդ մաքսային վճարների 50 տոկոսի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

«ՔՈՐԹՀԻԼ ԿՈՐՊՈՐԱՑԻԱՅԻ ՀԱՅԱՍՏԱՆԻ ՄԱՍՆԱՃՅՈՒՂ» ՕԻԱՄ մաքսային ձևակերպումներ իրականացրած Ռոբերտ Ավոյանը 24.07.2020թ. ծանուցագրով 2020 թվականի օգոստոսի 10-ին հրավիրվել է ՀՀ ՊԵԿ իրավաբանական վարչություն իր նկատմամբ սկսված վարչական գործի վարույթին մասնակցելու համար, սակայն չի ներկայացել:

Նույն ծանուցագրով 2020 թվականի հուլիսի 21-ին հրավիրվել է գործի քննությանը՝ միաժամանակ նախազգուշացվելով, որ ՀՀ մաքսային օրենսգրքի 219-րդ հոդվածի համաձայն՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել, առարկություններ, դիտողություններ չի ներկայացրել:

Այսպիսով, նյութերով պարզվել է, ՀՀ-ում գործող «ՔՈՐԹՀԻԼ ԿՈՐՊՈՐԱՑԻԱՅԻ ՀԱՅԱՍՏԱՆԻ ՄԱՍՆԱՃՅՈՒՂ» ՍՊ ընկերության անվամբ ՀՀ ներմուծված և փաստացի ԵԱՏՄ ԱՏԳ ԱԱ 8429 40 100 0 ծածկագրի տակ դասակարգվող ապրանքները՝ «ՔՈՐԹՀԻԼ ԿՈՐՊՈՐԱՑԻԱՅԻ ՀԱՅԱՍՏԱՆԻ ՄԱՍՆԱՃՅՈՒՂ» ՍՊ ընկերության մաքսային ձևակերպումներ իրականացրած Ռոբերտ Ավոյանը թիվ 05100010/051118/0070419 ապրանքային հայտարարագրով հայտարարագրել է ոչ ճիշտ ԵԱՏՄ ԱՏԳ ԱԱ 8479 10 000 00 ծածկագրով, ինչի հետևանքով առաջացել են 2095081 ՀՀ դրամի չափով պակաս հաշվարկված մաքսային վճարներ, այսինքն՝ Ռոբերտ Ավոյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ նախատեսված մաքսային կանոնների խախտում, ինչը հիմնավորվում է 10.07.2020թ.-ին կազմված մաքսային կանոնների խախտման արձանագրությամբ, 06.07.2020թ. ՀՀ ՊԵԿ հետբացթողումային հսկողության վարչության կողմից կայացված կամերալ մաքսային ստուգման թիվ 0042-Ա ակտով, 06.07.2020թ. թիվ 0042-Ո-1 որոշմամբ, թիվ 05100010/051118/0070419 ապրանքային հայտարարագրով:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ, 206-րդ և 221-րդ հոդվածներով,

Ո Ր Ո Շ Ե Ց Ի՝


1. Ռոբերտ Ավոյանին (ծնված՝ 24.04.1987թ., ազգությամբ հայ, ՀՀ քաղաքացի, բնակվող՝ ք.Երևան, Նոր Արեշ 8 փ 29, նույնականացման քարտ՝ 004827721) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ և նրան տուգանել պակաս հաշվարկված մաքսային վճարների 50 տոկոսի չափով՝ 1047540 ՀՀ դրամ:

/վճարումը 900005024055 հաշվեհամարին/:

2. Որոշման մասին հայտնել Ռոբերտ Ավոյանին՝ պարզաբանելով, որ ՀՀ մաքսային օրենսգրքի 221-րդ հոդվածի համաձայն՝ որոշումն ուժի մեջ է մտնում կայացման պահից և Վարչարարության

հիմունքների և վարչական վարույթի մասին ՀՀ օրենքի 71 հոդվածի համաձայն՝ 2 ամսվա ընթացքում կարող է բողոքարկվել վերադաս մաքսային մարմին կամ ՀՀ վարչական դատավարության օրենսգրքի 72-րդ հոդվածի 1-ին մասին 1-ին կետի համաձայն՝ 2 ամսվա ընթացքում ՀՀ վարչական դատարան:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



Ա. ՄՆԱՑԱԿԱՆՅԱՆ